

- प्रधानमंत्री नरेन्द्र मोदी नुवा कामां ने बधावो देवण सागे ए.आई. भविष्य बणावण माथे जोर दीनो ।
- राजस्थान समेत 17 राज्यां अर केन्द्र रा राज वाळा प्रदेशां मांय "वाइब्रेंट विलेज प्रोग्राम रो दूजो दौर काल सरु व्हेला ।
- प्रदेश मांय आरटीई रा तैत गैर सरकारी स्कूलां मांय मुफ्त दाखिला री प्रक्रिया काल सरु व्हेला ।
- वायु सेना री करतब बतावण वाळी सूर्यकिरण अर सारंग टीमां रो पहलो शो काल जयपुर रा जलमहल री पाल माथे राख्यो जावेला ।

000

प्रधानमंत्री नरेन्द्र मोदी नवाचार ने बधावो देवण, सगळां ने सागे ले र चालण अर इंसानी मूल्यां ने भेळा कर र आगे चालण वाळो ए.आई. भविष्य बणावण माथे जोर दीनो है । वे आज इंडिया ए.आई. इम्पैक्ट समिट मांय बोल रह्या हा । श्री मोदी कह्यो के प्रौद्योगिकी अर इंसानी भरोसो एके सागे चालण परां ए.आई. रो असली असर निजर आवेला । वे कह्यो के ए.आई. रा बारा मांय भारत रो नजरियो एक दम साफ है अर ए.आई. इंसानियत रा फायदा सारु भेळो साधन है ।

000

ए.आई. रा नैतिक उपयोग रा बारा मांय प्रधानमंत्री डेटा संप्रभुता रो मान करण वाळा ए.आई. प्रशिक्षण सारु मजबूत डेटा फ्रेमवर्क री जरूरत माथे जोर दीनो । श्री मोदी ए.आई. प्लेटफार्म सारु साफगोई सागे सुरक्षा नियमां रा महत्त्व माथे जोर दीनो । प्रधानमंत्री कह्यो के ए.आई. ने साफ इंसानी मूल्यां अर गेलो बतावण री जरूरत है ।

000

केंद्रीय गृह अर सहकारिता मंत्री अमित शाह रो काल असम रा कछार जिला ऊँ "वाइब्रेंट विलेज प्रोग्राम रा दूजा दौर री सरुआत करण रो कार्यक्रम है । 6 हजार 839 करोड़ रुपया रा खर्च प्रस्ताव वाळी आ केंद्रीय योजना राजस्थान समेत 15 राज्यां अर केंद्र रा राज वाळा 2 प्रदेशां मांय लागू करी जावेला । ई कार्यक्रम रो मकसद देश रा सरहदी गांवां मांय बुनियादी ढांचो मजबूत करणो, जरूरी सेवावां री पहुँच बधावणो अर काम धंधा रा मौका बधावणो है । माली साल 2028-29 तांई चलायी जावण वाळी ई योजना रे जरिये सरहदी हलकां रा रहवासियां ने हिफाजत री निजर ऊँ मजबूत बणा र सरहद अर अन्दरूणी हिफाजत ने और बेहतर बणायी जावेला ।

000

मुख्यमंत्री निःशुल्क जांच योजना रा तैत जिला अर सैटेलाइट अस्पतालां मांय 56, सामुदायिक स्वास्थ्य केंद्रां मांय 37 अर प्राथमिक केंद्रां मांय 15 भांत री जांचां मुफ्त करी जावे है । चिकित्सा अर स्वास्थ्य मंत्री गजेंद्र सिंह खींवर आज विधानसभा मांय प्रश्नकाल रे दौरान एक सवाल रो जवाब देता थकां आ जाणकारी दीनी । वे बतायो के मुफ्त दवा योजना रा तैत सैटेलाइट अस्पतालां मांय 1097 अर सामुदायिक केंद्रां मांय 771 भांत री दवाइयां मुहैया करायी जा रही है । मंत्री बतायो के आस वाळी लुगाइयां ने जापा रा 42 दिन पाछे तांई राज्य रा 2065 केंद्रां माथे इलाज रो मुफ्त सुबीतो दियो जा रह्यो है ।

000

गृह राज्य मंत्री जवाहर सिंह बेढम कह्यो है के राज्य सरकार भ्रष्टाचार ने बिल्कुल बर्दाश्त नी करण री नीति बणायी है अर अर भ्रष्ट अहलकारां अर कर्मचारियां ने नी छोड़्या जावेला। वे आज विधानसभा परिसर मांय खबरनवीसां सागे बातचीत कर रह्या हा। बेढम कह्यो के भजनलाल सरकार भ्रष्टाचारियां रे खिलाफ लगातार कार्रवाई कर रही है। वे राज्य मांय कांग्रेस रा राज रे दौरान दागी अहलकारां अर कर्मचारियां ने बचावण रो आरोप माण्ड्यो।

000

सुप्रीम कोर्ट कह्यो है के मुफ्त योजनावां ऊँ देश रा माली विकास मांय अड़चन आ रही है। मुख्य न्यायाधीश न्यायमूर्ति सूर्यकांत, न्यायमूर्ति जॉय माल्या बागची अर न्यायमूर्ति विपुल एम पंचौली री पीठ कह्यो के देश रा घणखर राज्य राजस्व घाटा रे बावजूद विकास री अनदेखी करता थकां मुफ्त योजनावां चला रही है। अदालत तमिलनाडु विद्युत वितरण निगम लिमिटेड री अर्जी माथे सुणवाई करता थकां कह्यो के राज्यां ने मुफ्त भोजन, साइकिल अर बिजली देवण री बजाए नौकरी-धंधा रा मौका बधावण माथे ध्यान देवणो चाहिजे।

000

राष्ट्रीय मानवाधिकार आयोग सगळा राज्यां अर केंद्र रा राज वाळां प्रदेशां रा मुख्य सचिवां अर पुलिस महानिदेशकां ने नोटिस जारी कर र आयोग रा नाम रो गलत इस्तमाल करण वाळी स्वयंसेवी संस्थावां री पिछाण करण सारू कह्यो है। आयोग अहलकारां ने दो सप्ताह री मियाद मांय जरूरी कानूनी कार्रवाई करण अर नियमां री अनदेखी करण वाळी संस्थावां रा रजिस्ट्रेशन रद्द करण सारू कह्यो है।

000

शिक्षा का अधिकार अधिनियम-आरटीई रा तैत शैक्षणिक सत्र 2026-27 सारू गैर-सरकारी स्कूलां मांय 25 फीसदी सीटां माथे मुफ्त दाखिला सारू ऑनलाइन तरीका ऊँ नाम मण्डावण रो काम काल सरू व्हेला, जो 4 मार्च ताई चालेला। ई बारा मांय राज्य सरकार विगतवार दिशा-निर्देश जारी कीना है। इण मांय विद्यार्थियां रा मायत तैय पोर्टल माथे अर्जी अर जरूरी कागजात अपलोड कर सकेला।

इण ऊँ जुड़ी समस्यावां निपटावण सारू ई-मेल अर हेल्पलाइन नंबर 0151-2220140 अर 0141-2719073 रे जरिये संपर्क कर्यो जा सके है।

000

वायु सेना री हैरतअंगेज करतब बतावण वाळी सूर्यकिरण अर सारंग टीमां री ओर ऊँ काल अर 22 फरवरी ने जयपुर मांय जलमहल री पाल माथे खास कार्यक्रम राख्यो जावेला। इण मांय सूर्यकिरण डिस्प्ले टीम रा हवाई जहाज अर सारंग डिस्प्ले टीम रा हेलिकॉप्टर करतब बतावेला। ई दौरान तिरंगा रा रंग रो धुंओ छोडण रो ई दरसाव कर्यो जावेला। इण ने देखण सारू आवण वाळा करीब 50 हजार जणां रा सुबीता सारू खास व्यवस्था करी ज्यी है। विंग कमांडर अंकित वशिष्ठ खबरनवीसां ने बतायो के ई कार्यक्रम रे ज़रिए जनता ने जोड़बा री कोशिश करी जावे है।

000

जयपुर रा जवाहर कला केंद्र मांय लोक कला संगम राख्यो जावेला। तीन दिन रा ई आयोजन मांय 400 ऊँ बत्ता कलाकार 50 ऊँ बत्ती लोक कलावां रो दरसाव करेला। ई कार्यक्रम मांय प्रदेश रा न्यारा-न्यारा हलकां री लोक कला अर नाच-गाण पेश कर्या जावेला।

चौपाल कार्यक्रम मांय भांत-भांत री कलावां रा बारा मांय जाणकार विचार बतावेला। शिल्पग्राम मांय कला अर हाथ री कारीगरी ऊँ जुड़ी खास प्रदर्शनी ई लगायी जावेला। आयोजन समिति री अध्यक्ष अर नामी ध्रुपद गायक मधु भट्ट तैलंग आकाशवाणी ने बतायो के ई कार्यक्रम रो मकसद नुवी पीढ़ी ने लोक कलावां री जाणकारी देवणो है।

000

हनुमानगढ़ जिला मांय मायडां अर टाबरां रा स्वास्थ्य ने और बेहतर बणावण अर आस वाळी लुगाइयां मांय जाग जगावण सारु चिकित्सा विभाग "गर्भ की पाठशाला" नाम रो यूट्यूब चैनल चलायो है। म्हाणी खबरनवीस बतायो के ई चैनल रे जरिये मुशिकल मेडिकल शब्दावली ने हिन्दी मांय समझायी ज्यी है।

000

आईसीसी टी-ट्वेंटी क्रिकेट विश्व कप मांय सुपर-8 दौर रा मुकाबला तैय व्हे गया है। पहला ग्रुप मांय भारत, दक्षिण अफ्रीका, वेस्टइंडीज अर जिम्बाब्वे अर दूजा ग्रुप मांय इंग्लैंड, न्यूजीलैंड, पाकिस्तान अर श्रीलंका री टीमां व्हेला। अ आठ टीमां थावर ऊं सेमीफाइनल मांय ठौड़ बणावण सारु खेलेला। हर ग्रुप री दो अक्ल टीमां होड़ रा सेमीफाइनल दौर मांय पूगेला। ई बीचे, आज कोलकाता मांय वेस्टइंडीज इटली ने 42 रन ऊं शिकस्त दीनी। वेस्टइंडीज तैय 20 ऑवर रा खेल मांय 165 रन बणाया अर वां रा 6 बल्लेबाज आउट व्ह्या। जवाब मांय इटली री पूरी टीम 18 ओवर खेल र 123 रन बणा र आउट व्हे गयी। आज रा एक और मुकाबला मांय कोलंबो मांय जिम्बाब्वे मेजबान श्रीलंका ने 6 विकेट ऊं शिकस्त दीनी। श्रीलंका टॉस जीत र पैली बल्लेबाजी करता थकां तैय 20 ऑवर रा खेल मांय 178 रन बणाया अर वां रा 7 बल्लेबाज आउट व्ह्या। जवाब मांय जिम्बाब्वे री टीम 3 गेंद बाकी रहता 182 रन बणा लीना अर वां रां 4 बल्लेबाज आउट व्ह्या। अब ऊं थोड़ी देर पछे सरु व्हे रह्या एक और मुकाबला मांय चेन्नई मांय अफगानिस्तान अर कनाडा आमी-सामी व्हेला।

000

जयपुर रा चौधरी चरण सिंह राष्ट्रीय कृषि विपणन संस्थान मांय खेती-बाड़ी आधारित स्टार्टअप उत्पादां री प्रदर्शनी लगायी ज्यी है। इण मांय रागी, ज्वार अर बाजरा सरीखा श्रीअन्न ऊं बणायी ज्या चिप्स अर अंकुरित अनाज रा मिश्रण रो दरसाव करी ज्यो है।

000